

摘藻堂四庫全書薈要

集部

欽定四庫全書薈要卷一萬八千七百八十一

集部

御定佩文齋詠物詩選卷一百五十九

印笏類

四言古

印衣銘

漢胡廣

明明聖皇旌以命服紆朱懷金為光為飾邁種其澤撫
寧四國宣慈惠和柔嘉維則克副帝心膺茲多福登位
歷壽子孫千億

印銘

漢李尤

赤紱在服非印不明
綦傳符節非印不行
龜鈕犢鼻用
爾作程

印銘

晉傅玄

往昔先王配天垂則
乃設印章作信萬國
取象晷度是
銘是刻文明慎密直
方其德本立道生歸
乎玄默太上
結繩下無荒慝

笏讚

晉王升之

慎為德要惟善用光敬上尊賢貴不踰常用制斯器備
對遺忘因事施禮升降有章

七言古

附長短句

謝王仲至惠洮州礪石黃玉印材

宋

黃庭堅

洮礪發劒吐貫日印章不琢色蒸栗磨礪頑鈍印此心
故人持贈意堅密故人鬢凋文字工藏書萬卷胸次同
日臨天閑恭真龍新詩得意挾雷風我貧無句當二物

看公倒海取明月

孔道輔擊蛇笏

元

趙孟頫

以笏擊蛇有孔公義與段公擊賊同事之鉅細雖有異
正氣憤激生於中偉哉孔公聖人裔豈聽妖邪惑民志
即今槐木一尺強氣象凜凜含風霜子孫守之慎寶藏
絕勝象牙堆滿牀

題姑蘇陸友仁所藏衛青印

元

揭傒斯

白玉蟠螭小篆文姓名識得衛將軍衛將軍今何在白

草茫茫古時塞將軍功業漢山河江南陸郎古意多

五言律

決道廿八弟得小金印以詩贈之

宋

晁冲之

季也獲金印籀文秦不如情知非鳥跡恨不識天書池
靜龜遊罷庭閑鵲鬪餘春風還舊物疎俊最憐渠

贈貢泰甫先生牙笏詩

元

李士瞻

象簡凝霜重蒼髯雪色新轉輸勞算用報答費經綸垂

珮朝明主臨軒問老臣此時江海上人已厭風塵

七言律

獲玉印

三茅山道童遇白兔入穴掘之得九老仙都君玉印一顆乃宣和故物也

元

吳全節

瑤瑛篆刻鎮華陽猶帶宣和雨露香玉兔有靈開地藏
金童無意得天章九重臺上增春色萬里書中耿夜光
喜遇明時薦神瑞三君珍重護宏綱

七言絕句

戲題襲美書印囊

唐
陸龜蒙

鵲銜龜顧妙無餘
不愛封侯愛石渠
應笑休文過萬卷
至今誰道沈家書

奉和陸魯望印囊次韻

唐
皮日休

金篆方圓一寸餘
可憐銀艾未思渠
不知夫子將心印
印破人間萬卷書

御定佩文齋詠物詩選卷一百五十九

欽定四庫全書薈要卷一萬八千七百八十二

集部

御定佩文齋詠物詩選卷一百六十

冠簪類

四言古

冠幘銘

漢

李尤

冠爲元服幘爲首服君子敬慎自強不忒

五言古

贈四王冠詩

漢

應亨

濟濟四令弟妙年踐二九令月維吉日成服加元首人
咸飾其容鮮能離塵垢雖無兕觥爵杯醕傳旨酒

贈潘正叔

晉

陸機

過蒙時來運與爾遊承華執笏崇賢內振纓曾城阿

五言律

翻著葛巾呈趙尹

唐

張說

昔日接羅倒今我葛巾翻宿酒何時醒形骸不復存忽
聞有佳客躡步出閒門桃花春徑滿誤識武陵源

答陳拾遺贈竹簪

唐張九齡

與君同此志因物復知心
遺我龍鍾節非無玳瑁簪
幽素宜相重雕華豈所任
為君安首飾懷此代兼金

酬賀四贈葛巾之作

唐王維

野巾傳惠好茲貺重兼金
嘉此幽棲物能齊隱吏心
早朝方暫挂晚沐復來簪
坐覺囂塵遠思君共入林

詠白油帽送客

唐錢起

薄質慚加首微陰幸庇身
卷舒無定日行止必依人
已

沐脂膏惠寧辭雨露頻雖同客衣色不染洛陽塵

答寄芙蓉冠子

唐王建

一學芙蓉葉初開映水幽雖經小兒手不稱老夫頭枕
上眠常戴風前醉恐柔明年有閨閣此樣必難求

答友人惠牙簪

唐章孝標

牙簪不可忘來處隔炎方截得半輪月磨成四寸霜曉
辭梳齒膩秋入髮根涼好是紗巾下纖纖錐出囊

山友寄蘚花冠

唐項斯

塵汙出華髮慚君青
蘚冠此身閒未得終日戴應難好
就松陰掛宜當枕石看會須尋道士簪去繞霜壇

丁孝廉惠冠巾

明高啟

知試山人服冠巾遠寄重佳名
因子夏舊製學林宗衆
映秋吟鬢敬宜晚醉容朝簪今已解期上華陽峰

酬惟喬贈巾

明薛蕙

野巾初著日心賞竟朝曛試正行窺水從敬卧看雲坐
翻嫌月露出每避塵氛顧影還相笑風流媿使君

七言律

以紗巾寄魯望因而有作

唐皮日休

周家新樣替三梁

頭巾起後周武帝

裴髮偏宜白面郎掩斂乍

疑裁黑霧輕明渾似戴玄霜今朝定見看花側明日應
聞漉酒香更有一般君未識虎文巾在絳霄房

襲美以紗巾見惠繼以雅音因次韻酬謝

唐陸龜蒙

薄如蟬翅背斜陽不稱春前贈蜀郎初覺頂寒生遠吹

預憂頭白透新霜堪窺水檻澄波影好拂花牆亞蕊香
知有芙蓉畱自戴

桐栢真人
戴芙蓉冠

欲峨煙霧訪黃房

友人遺華陽巾

唐

闕名

剪霧裁烟勝角冠來從玉洞五雲端醉宜薤葉敲斜影
穩稱菱花仔細看野客愛留籠鶴髮谿翁爭乞配魚竿
真仙首飾勞相寄塵土翻慚戴去難

椰子冠

宋

蘇軾

天教日飲欲全絲美酒生林不待儀自漉疎巾邀醉客

更將空殼付冠師規模簡古人爭看簪導輕安髮不知
更著短檐高屋帽東坡何事不違時

謝人惠雲巾

蘇軾

燕尾稱呼理未便剪裁雲葉却天然無心只是青山物
覆頂宜歸紫府仙轉覺周家新樣俗未容陶令舊名傳
鹿門佳士勤相贈黑霧玄霜合比肩

網巾

元謝宗可

烏紗未解滌塵袪一網清風兩鬢寒
篩影細分雲縷滑

棋文斜界雪絲乾不須漁父燈前結且向詩翁鏡裏看
頭上任渠籠絡盡有時華髮亦衝冠

謝戴文瓚僉院惠草帽

元陳高

細結夫須染色新使君持贈意偏真玉川便易煎茶帽
元亮還拋漉酒巾影墮水波浮晚照黑遮霜鬢隔秋塵
深慚欲報無瓊玖感戴寧忘拂拭頻

別帽

元丁鶴年

雲樣飄蕭月樣團百年雄麗壓南冠黃金綴頂攢文羽

白壁垂纓間木難刺繡尚期平敵壘簪花曾夢舞仙壇
一從吹墮西風裏誰念塵沙白髮寒

陵祀歸得賜煖耳詩和方石韻

明

李東陽

烏紗巾上透涼颼一髮君恩力未辭賜煖宮貂同日戴
冒寒郊馬有人騎耳聞明主如絲詔心似窮民挾纊時
明向玉階還再拜羔羊重續退公詩

簪冠

明

朱之蕃

龍孫頭角舊青霄
蛻甲斑紋永不凋
偃月製成籠短髻
切雲剪就映高標
都門掛後名心淨
湖曲歸來逸興驕
酒漉葛巾慵更著
行吟搔首自逍遙

戊寅正月上尚巾禮成羣臣稱賀賜白金文綺

明
于慎行

負宸年來海岳安
春朝繡幘始加冠
龍樓拂曙天顏近
玉座垂旒日角寬
九廟神靈應已慰
兩階環珮不勝歡
邇臣幸奉青蒲對
珍賜還看出上闌

五言絕句

答友人贈烏紗帽

唐李 白

領得烏紗帽全勝白接羅
山人不照鏡稚子道相宜

七言絕句

答元八遺紗帽

唐張 籍

黑紗方帽君邊得稱對山前坐
竹牀惟恐被人偷樣剪
不曾閒戴出書堂

華陽巾

唐陸龜蒙

蓮花峯下得佳名，雲褐相兼上鶴翎。
須是古壇秋霽後，靜焚香炷禮寒星。

漉酒巾

陸龜蒙

靖節高風不可攀，此巾猶墜凍醪間。
偏宜雪夜山中戴，認取詩情與醉顏。

清興

唐韓偓

陰沈天氣連翩醉，摘索花枝料峭寒。
擁鼻遶廊吟看雨，不知遺却竹皮冠。

小遊仙詩

唐
曹唐


昨夜相邀宴杏壇等閒乘醉走青鸞
紅雲塞路東風緊吹綻芙蓉碧玉冠

玉山草堂口占

元
顧瑛

醉吸杯中月隔屋香傳蕊上花
狂煞會稽于外史秋風吹墮小烏紗

御定佩文齋詠物詩選卷一百六十



總校官庶吉士臣侍朝

校對官檢討臣蕭九成

謄錄監生臣劉天蒼

謄錄監生臣李本

謄錄舉人臣張昱

欽定四庫全書薈要

集部

御定詠物詩選卷二百六十八

一至

詳校官原任主事臣李斯咏

欽定四庫全書薈要卷一萬八千七百八十三

集部

御定佩文齋詠物詩選卷一百六十一

衣類附帕

五言古

新製布裘

唐白居易

桂布白似雪吳綿軟於雲布重綿且厚為裘有餘溫朝
擁坐至暮夜覆眠達晨誰知嚴冬月肢體暖如春中夕
忽有念撫裘起逡巡丈夫貴兼濟豈獨善一身安得萬

里裘蓋裹周四垠穩暖皆如我天下無寒人

黑裘

宋王禹偁

野蠶自成繭繰密為山綢此物產何許萊夷負海州一
端重數斤裁染為褰裘守黑異華侈崇儉非輕柔熏香
則無取風雪曾何憂朝可奉冠帶夜以為衾綢晏嬰三
十年庶幾跡相伴季子歎貂弊吾服已為優不恥狐貉
者亦當師仲由况我屢遷謫行採賡歌謳映髮垂鷺頂
植杖昂鳩頭袖寬可以舞老農即為儔不曳銀臺門任

爾爭封侯

澣衣圖

元

曹伯啟

靜女思歸寧澣衣拜高堂隱士履貞固濯纓視滄浪苟
有涓潔心顛顚猶姬姜常懷濟時策進退皆康莊

藤蓑次陳公甫韻

明

李東陽

采藤復采藤日夕費斤斧製為身上蓑人古衣亦古借
問製者誰白沙乃蓑祖冉冉綠蓑衣蕭蕭白沙渚披蓑
向江水顧影還獨語愛此勿輕捐春江正多雨

藤蓑

明
陳憲章

一蓑費幾藤南岡礪朝斧交加落翠鬢制作類上古吾
聞大澤濱羊裘動世祖何如六尺蓑滅跡蘆花渚舉俗
無與同天隨夢中語今夜不須歸前谿正風雨

其二

新蓑藤葉青舊蓑藤葉白新故理則然胡為妄忻戚扁
舟西湖口坐望南山石東風吹新蓑浩蕩滄溟黑須臾
月東上萬里天一碧安得同心人婆娑共今夕

七言古

附長短句

訓殷明佐見贈五雲裘歌

唐李 白

我吟謝朓詩上語朔風颯颯吹飛雨謝朓已往青山空
後來繼之有殷公粉圖珍裘五雲色燦如晴天散綵虹
文章彪炳光陸離應是素娥玉女之所為輕如松花落
金粉濃似苔錦含碧滋遠山積翠橫海島殘霞霏丹映
江草凝毫採掇花露容幾年功成奪天造故人贈我我
不違著令山水含清暉頓驚謝康樂詩興生我衣襟前

林壑斂暝色袖上烟霞收夕霏羣仙長嘯驚此物千崖
萬嶺相縈鬱身騎白鹿行飄飄手翳紫芝笑披拂相如
不足誇鸛鶴王恭鶴氅安可方瑤臺雪花數千點片片
吹落春風香為君持此凌蒼蒼上朝三十六玉皇下窺
夫子不可及矯首相思空斷腸

雪軒高士以白紵製服作歌戲贈

元周權

經冰緯玉紛縱橫三盟寒露方織成曉機裂下不敢翫

一道雪瀑來中庭天然精潔不可浣犀熏麝染慚吳綾
製成素服輕於雪雅稱仙官鏘珮玦星斗離離夜插椽
高興飄飄白銀闕乘風便控紫鸞車瓊簫吹落蓬萊月

擬寄衣曲

元鄭允端

男兒遠向交河道鐵馬金戈事征討邊頭八月霜風寒
欲寄征衣須趁早急杵清砧擣夜深玉纖銅斗熨貼平
裁縫製就衣襖裙千針萬線始得成封裹重重寄邊使
為語夫君奮忠義好將功業立邊陲要使聲名垂史記

裁衣行

明
劉秩

裁衣須裁短短衣短衣上馬輕如飛縫袖須縫窄窄袖
袖窄彎弓不礙肘短衣窄袖樣時新殷勤寄與從軍人
願郎著衣便弓馬破敵長驅古城下明年佩印披紫緋
裁衣不比從軍時

五言律

端午日賜衣

唐
杜甫

宮衣亦有名端午被恩榮細葛含風軟香羅疊雪輕自

天題處濕當暑著來清意內稱長短終身荷聖情

謝令狐綯相公賜衣九事

唐賈島

長江飛鳥外主簿跨驢歸逐客寒前夜元戎與厚衣雪
來松更綠霜降月彌輝即入調殷鼎朝分是與非

敝裘

元楊載

寂寞牛衣子能無敝緼袍塵埃須浣濯蟣蝨費爬搔意
味存雞肋寒涼視馬毛千金既銷鑠猶聽朔風號

謝賜衣

明高啟

臚呼遙捧賜拜服望蓬萊香帶爐煙下光迎扇月開奇
文天女織新樣內官裁被澤徒深厚慚無奪錦才

五言排律

古錦裾

唐
吳融

濯水經何日隨風故有人綠衣猶逼畫丹頂尚迷真

錦上

有鸚鵡

暗淡雲沈古青蒼
鮮剝新映襟知染唾侵韉想縈

塵掣曳無由覩流傳久自珍
武威應認得牽挽幾當春

七言律

元九以紵絲布白輕襖見寄製成衣服以詩報之

唐白居易

綠絲文布素輕襖珍重京華手自封
貧友素勞君寄附
山妻親為我裁縫
袴花白似秋雲薄
衫色青於春草濃
欲著却休知不稱
折腰無復舊形容

聞行簡恩賜章服喜成長句寄之

白居易

吾年五十加朝散
爾亦今年賜服章
齒髮却同知命歲

官銜俱是客曹郎
榮傳錦帳花聯萼
綵動綾袍鴈趁行
大抵著緋宜老大
莫嫌秋鬢數經霜

喜劉蘇州恩賜金紫遙想賀讌以詩慶之

白居易

海內姑蘇太守賢
恩加章綬豈徒然
賀賓喜色欺杯酒
醉妓歡聲遏管絃
魚珮葺鱗光照地
鵲銜瑞草勢冲天
莫嫌鬢上些些白
金紫由來稱長年

和楊六尚書喜兩弟漢公轉吳興魯士賜章服

命賓開宴用慶恩榮賦長句見示

白居易

華筵賀客日紛紛
劍外歡娛洛下聞
朱紱寵光新照地
彤襜喜氣遠凌雲
榮聯花萼知難和
樂助埴簫酒易醺
感羨料應知我意
今生此事不如君

故衫

白居易

闇淡緋衫稱老身
半披半曳出朱門
袖中吳郡新詩本
襟上杭州舊酒痕
殘色過梅看向盡
故香因洗嗅猶存

曾經爛漫三年著欲棄空箱似少恩

訓樂天得稹所寄紵絲布白輕裾製成衣服以

詩報之

唐元稹

湓城萬里隔巴庸紵薄綈輕共一封腰帶定知今瘦小
衣衫難作遠裁縫惟愁書到炎涼變忽見詩來意緒濃
春草綠茸雲色白想君騎馬好儀容

和蔣學士新授章服

唐王建

五色箱中絳服春笏花成就白魚新看宣賜處驚迴眼

著謝恩時便稱身瑞草惟承天上露紅鸞不受世間塵
翰林同賀文章出驚動茫茫下界人

賀淮南節度盧員外賜緋

唐羅隱

儉蓮高貴九霄間燦燦朱衣降五雲
驄馬早年曾避路銀魚今日且從軍
銜題綵服垂天眷袍展花心透縠紋
應笑當年老萊子鮮華都降自明君

賀淮南節度盧員外賜緋

唐徐商

朱紫花前賀故人兼榮此會頗關身
同年座上聯賓榻

宗姓亭中布錦裯晴日照旗紅灼爍韶光入隊影玢璘
芳菲解助今朝喜嫩蕊青條滿眼新

賀盧員外賜緋

唐
段成式

雲雨軒懸鶯語新一篇佳句占陽春銀黃年少偏欺酒
金紫風流不讓人連壁座中斜日滿貫珠歌裏落花頻
莫辭倒載吟歸去看取東山又吐茵

賀盧員外賜緋

唐
王 傳

朱紫聯輝照日新芳菲金屬斷金人華筵重處宗盟地

白雪飛時郢曲春仙府色饒攀桂侶蓮華光讓握蘭身
自憐亦是膺門客吟想恩榮氣益振

歸鄉蒙賜錦衣

唐翁承贊

九重宣旨下丹墀面對天顏賜錦衣中使擎來三殿曉
寶箱開處五雲飛德音耳聽君恩重金印腰懸已力微
更待臨軒陳鼓吹星軺便指故鄉歸

宣賜錦袍設上贈諸郡客

唐劉兼

十月芙蓉花滿枝天庭驛騎賜寒衣將同玉蝶侵肌冷

也遣金鵬徧體飛夜卧始知多忝竊晝行方覺轉光輝
深冬若得朝丹闕太華峰前衣錦歸

道服

宋王禹偁

楮符布褐皂紗巾曾奉西垣寓直人此際暫披因假日
如今長著見閒身濯纓未識三湘水漉酒空經五柳春
不為行香著朝服二車誰信舊詞臣

謝茅山主者贈白羅氎衣請為作大洞祖宗師

四十五贊

元虞集

鶴氅裁成雪色新
仙翁持寄感情真
清高自此全拋俗
寬博由來穩稱身
珮玉洞間雲外響
劒光飛射日中塵
畫圖寫向羣真裏
便是揮毫贊詠人

登第賜章服

元宋 裴

承平天子重科名
章服分頒出大明
袍是涿羅香縷細
笏勝楷木素文橫
晨趨象魏雲霞燦
夕奏龍池玉雪清
遙想鳴珂朝會處
鵷行爭訝被恩榮

戊寅正月進講賜大紅織成緞衣一襲

明
于慎行

講殿朝朝聖渥頻賜衣又見出楓宸織成共識金梭巧
貢到初開錦樣新色借宮雲紅近日香浮仙珮暖宜春
垂裳幸值軒唐理補袞無勞媿許身

五言絕句

尚書念舊垂賜袍衣率題絕句獻上以申感謝

唐
岑參

富貴情猶在相逢豈間然綈袍更有贈深荷故人憐

邊軍支春衣

唐 柳公權

挾纈非真纈分衣是假衣從今貔虎士不憚戍金微

四時宮詞

元 曹文晦

雪亞雙鴛瓦寒生五鳳樓羊羔初燕罷分賜繡龍裘

古詞

明 高 啟

妾刀不斷機郎行當早歸還將機中錦作郎身上衣

古意

明 趙南星

錦織雙鴛鴦還自裁為衣恐入他人手不解惜分飛

七夕詠百花畫衣

明柳應芳

七夕畫衣裁一花一色開
當筵翻酒濕爭道渡河來

典衣曲

明陳鴻

典盡衣難贖鄰家夜搗砧
那堪風露冷兒女說秋深

六言絕句

七月寄衣

明董少玉

鴈鴻何處飛鳴滿目蕭條黃草書來先寄寒衣風雨太

原秋早

七言絕句

花褐裘

唐張籍

對織芭蕉雪毳新
長縫衫袖窄裁身
到頭須向邊城著
消得秋風稱獵塵

戲題試衫

唐司空圖

朝班盡說人宜紫
洞府應無鶴著緋
從此玉皇須破例
染霞裁賜地仙衣

小遊仙詞

唐曹唐

八海風涼水影高上卿教製赤霜袍
鮫絲玉線難裁割
須借玉妃金剪刀

新服裁製初成

唐
薛濤

紫陽宮裏賜紅綃仙霧朦朧隔海遙
霜兔毳寒冰繭淨
嫦娥笑指織星橋

其二

九炁分為九色霞五靈仙馭五雲車
春風因過東君舍
偷樣人間染百花

劉子澄寄羊裘

宋朱子

誰把羊裘與醉披
故人心事不相違
意行今夜知何處
月冷風淒未肯歸

輦下曲

元張昱

只孫官樣青紅錦
裹肚圓文寶相珠
羽仗執金班控鶴
千人魚貫振嵩呼

宮詞

元柯九思

萬里名王盡入朝
法宮置酒奏蕭韶
千官一色真珠襖

寶帶攢裝穩稱腰

惟寅徵君踏雨過林館為畱終日因誦近賦絕

句三首輒走筆奉和

錄一

元周砥

秋來長掩竹間扉過客誰能識道機
慚愧廬山陳處士
時來共葺薜蘿衣

山居詩

元僧清珙

一天紅日曉東南
自拔青苗插瘦田
布襪半沾泥水濕
歸來脫曬竹房前

元宮詞

明朱有燬

閭闔門開擁鉞旄
千官侍立曉星高
尚衣欲進虬龍服
錯捧天鵲織錦袍

其二

健兒千隊足如飛
隨從南郊露未晞
鼓吹聲中春日曉
御前咸著只孫衣

其三

纖纖初月鵲黃嫩
淺淺方池鴨綠澄
內苑秋深天氣冷

越羅衫子換吳綾

貞谿初夏

明邵亨貞

雨過深林竹筍肥
渡頭風急柳花飛
柴門不掩綠陰靜
人在閒窓試苧衣

扈從巡邊至宣府往還雜詩

明楊士奇

懷來城外夜微雪
風送輕寒初著身
平旦馬前紅一色
回軍共試賜衣新

小景

明祝允明

濃雲壓嶺雨初至密葉障林風更多只有漁翁能了事
一枚圓笠半肩蓑

弘治宮詞

明王世貞

南海珠池貢已稀西川又罷錦文機朝來御服三經澣
賤妾寧希曳地衣

長安春雪曲

明王穉登

勒寒桃李未成蹊啄雪流鶯已自啼進得貂裘渾不著
聖人春日賜征西

題衲衣

明陸樹聲

解組歸東萬事捐，盡將身世付安禪。
披來戒衲渾無事，不向歌姬為乞緣。

遊仙曲

明屠瑤瑟

銀臺珠樹是仙家，綺閣晴嬌四照花。
不用安妃裁蜀錦，銖衣多剪赤城霞。

裁衣

明董少玉

芙蓉江北雁飛飛，燕子磯邊人未歸。
只怕沈郎腰已瘦，

遲迴難寄舊時衣

附帕

七言律

鮫綃帕

明瞿佑

繭結扶桑出海濱，遠隨機杼倩鮫人。
不裁洛浦凌波襪，能代湘川拭淚巾。
紫麝熏香收汗潤，彩毫傳恨寄情真。
吳綾輕薄番羅俗，出袖宜同掌上珍。

御定佩文齋詠物詩選卷一百六十一

欽定四庫全書薈要卷一萬八千七百八十四集部

御定佩文齋詠物詩選卷一百六十二

帶佩類

五言古

玉環引送馬伯庸北上

元 王士熙

崑山有美璞昆吾有寶刀推雪漉寒冰凝此英瓊瑤團
團月長滿晶晶白雲淺似環環無窮寥寥人意遠有美
天山人皎潔同精神禁垣青春多大珮垂朝紳腰無大

羽箭肘有如斗印結束上京行驪駒驟長勒不採珊瑚
鉤海深安可求不執水蒼璧漢庭羅公侯愛此玲瓏質
題詩贈與客百金一朝傾三年不可得不得只空行山
泉琴峽鳴摩挲龍門石憶憶應畱情天風北極高歸塗
踏霜艸不惜玉環分只願君還早

七言古

玉連環歌為邢從周典簿作

元張翥

于闐河頭夜光發赤髯賈胡采明月中有美璞凝寒晶

惟有鬼工能琢成伊誰得此邢公子示我綠玉雙連理
恍如空碧虹氣垂半隱青瑤蟾一規展之兩環不盈尺
疊作團團小蒼壁縠文錯落映雷文宛是昆吾寶刀刻
廬陵學士癖好奇辨古重以瓊琚詞珊瑚珮鉤詎可數
我疑製自金源時集賢仙人丈人行鳳閣舍人文有樣
請君畱東宮錦袍待看揮毫玉堂上

五言排律

冰精環

唐
羅維

王室符長慶環中得水精任圓循不極見素質仍貞信
是天然瑞非因樸斲成無瑕勝玉美至潔過冰清未肯
齊珉價寧同雜珮聲能銜任黃雀亦欲應時明

五言絕句

長安道

唐
麴信陵

朱門映綠楊雙闕抵通莊玉珮聲逾遠紅塵猶自香

佩韋

元
揭祐民

吾韋佩已久韋敝將若何縱有未革性謝韋功已多

七言絕句

以玉帶施元長老元以衲裙相報次韻

宋
蘇軾

瘦骨難堪玉帶圍
鈍根仍落箭鋒機
欲教乞食歌姬院
故與雲山舊衲衣

小遊仙

元
楊維禎

青旄節衛翠雲輶
按部東行過赤城
龍女遺珠雞卵大
結為雙佩賜方平

御定佩文齋詠物詩選卷一百六十二

欽定四庫全書會要卷一萬八千七百八十五

集部

御定佩文齋詠物詩選卷一百六十三

履鳥類

四言古

襪銘

漢崔駰

機衡建子萬物含滋黃鐘育化以養元基長履景福至
於億年皇靈既祐祉祿來臻本支百世子子孫孫

五言古

詠履

陳後主

賢舍觀穴踵瓜田
睹躡跡矩步今有儀
用此前嘉客

七言古

茸履

金李俊民

待詔門前東郭趾
藍關路上仙人迹
雪花紛披蓋地白
東家不借借不得
雖然近市屨亦無
以故為新即有餘
同行畱我木上座
補過仰渠金十奴
一生能著屐幾兩
用心猶在阮孚上
不須更覓下邳侯

時守下邳

山林此計成

長往

五言排律

賦得履

明高啟

穩稱遊方脚新編楚岸蒲滑欺峰頂石危怯世間途輕
曳愁妨蟻高飛笑化鳬上堂聲每衆度嶺影還孤著處
朝行道拋時夜結趺空山欲相訪落葉去蹤無

七言律

薛侍御處乞靴

唐李羣玉

越客南來誇桂麀良工用意巧縫成看時共說茱萸綳
著處嫌無鸛鵒鳴百里奚身嗟甚似五羊皮價敢全輕
日於文苑陪高步贏得芳塵接武名

謝人惠方舄

宋蘇軾

烏鞞短勒格粗疎古雅無如此樣殊妙手不勞盤作鳳
輕身只欲化為鳬魏風褊儉堪羞葛楚客豪華可笑珠
擬學梁家名解脫便於禪坐作跣趺

謝僧惠蒲履

元張昱

丈夫此日可徒行
蒲履深煩遠寄情
除是高僧求易得
自非巧手織難成
春來見客身差健
老去看花步覺輕
他日袈裟如過我
定須著此出門迎

贈鞋生

明僧溥洽

父子相傳履製奇
青絲細軟合時宜
聲隨鳴珮君王識
影落飛鳬太史知
泥滓乍離歸隱計
香雲纔振上昇期
年來敝屣無心棄
却笑干將補較遲

五言絕句

寄劉道士鳥

唐張說

真人降紫炁邀我丹田宮
遠寄雙鳬鳥飛飛不礙空

送丘員外歸山居

唐韋應物

郡閣始嘉宴青山憶舊居
為君量革履且願駐籃輦

七言絕句

謝雲居山人草鞋

宋張詠

雲居山客草為鞋路轉千峰此寄來
昨日公餘偷步躡
萬端心緒憶天台

山居雜詠

明僧大香

接葉陰陰喚水鳩
花坪草堰偶經遊
芒鞋曬向西巖石
露冷煙淒不記收

御定佩文齋詠物詩選卷一百六十三

欽定四庫全書薈要卷一萬八千七百八十六

集部

御定佩文齋詠物詩選卷一百六十四

屏障類

五言古

詠畫屏風詩

北周庾信

逍遙遊桂苑寂絕到桃源
狹石分花徑長橋映水門
管聲驚百鳥人衣香一園
定知歡未足橫琴坐石根

其二

上林春逕密浮橋柳路長龍媒逐細草鶴驚映垂楊水
似桃花色山如甲煎香白石春泉上誰能待月光

題畫山水障

唐
張九齡

心累猶不盡果為外物牽偶因耳目好復假丹青妍嘗
抱野間意而迫區中緣塵事固已矣秉意終不遷良工
適我願妙墨揮巖泉變化合羣有高深侔自然置陳北
堂上倣豫南山前靜無戶庭出行已茲地偏萱草憂可
樹合歡忿益蠲所因本微物况乃憑幽筌言象會自泯

意色聊自宣對翫有佳趣使我心渺綿

秋詠石屏

宋蘇軾

霏霏點輕素眇眇開重陰風花亂紫翠雪外有煙林雪
近勢方壯林遠意殊深會有無事人支頤識此心

雪林硯屏率魯直同賦

蘇軾

西山無時春巉巖鎖頑陰分明倚天壁點綴無風林物
固為人出興誰於此深窮竒真自蠹詩句且娛心

詠屏送周伯陽

明徐賁

巧飾辭雲母圖畫比晴天密防宜便坐連張須廣筵月
臨皎乃隱風當駛亦旋望處憑移障只恐見離船

七言古 附長短句

素屏謠

唐白居易

素屏素屏胡為乎不文不飾不丹不青當世豈無李陽
冰之篆字張旭之筆跡邊鸞之花鳥張藻之松石吾不
令加一點一畫於其上欲爾保真而全白吾于香爐峰
下置草堂二屏倚在東西牆夜如明月入我室曉如白

雲圍我牀我心久養浩然氣亦欲與爾表裏相輝光爾
不見當今甲第與王宮織成步障錦屏風綴珠陷鈿貼
雲母五金七寶相玲瓏貴豪待此方悅目然肯寢卧乎
其中素屏素屏物各有所宜用各有所施爾今木為骨
兮紙為面捨吾草堂欲何之

生禰屏風歌

唐
溫庭筠

玉墀暗接崑崙井井上無人金索冷畫壁陰森九子堂
階前細月鋪花影繡屏銀鴨香葦濛天上夢歸花繞叢

宜男漫作後庭草不似櫻桃千子紅

月石硯屏歌寄蘇子美

宋 歐陽修

月從海底來行上天東南正當天中時下照千丈潭潭
心無風月不動倒影射入紫石巖月光水潔石瑩淨感
此陰魄來中潛自從月入此石中天有兩曜分為三清
光萬古不磨滅天地至寶難藏緘天公呼雷公夜持巨
斧墮巔巖墮此一片落千仞皎然寒鏡在玉匳蝦蟇白
兔走天上空畱桂影猶毯毯景山得之惜不得贈我意

與千金兼自云每到月滿時石在暗室光出檐大哉天地間萬怪難悉談嗟予不度量每事思窮探欲將兩耳目所及而與造化爭毫纖煌煌三辰行日月尤尊嚴若令下與物為比擾擾萬類將誰瞻不然此石竟何物有口欲說嗟如鉗吾竒蘇子胸羅列萬象中包含不惟胸寬膽亦大屢出言語驚愚凡自吾得此石未見蘇子心懷慚不經老匠先指抉有手誰敢施鐫鐫呼工畫石持寄似幸子畱意其無謙

軾近以月石研屏獻子功中書復以涵星研獻
純父侍講子功有詩純父未也復以月石風
林研屏贈之謹和子功詩并求純父數句

宋蘇軾

紫潭出玄雲翳我潭上星獨有潭上月倒掛紫翠屏我
老不看書默坐養此昏花睛時時一開眼見此雲月眼
自明久知世界一泡影大小真偽何足評笑彼三子歐
梅蘇無事自作雪羽爭故將屏研送兩范要使珠璧栖

窓櫺大范忽長謠語出月脇令人驚小范當繼之說破
星心如雞鳴牀頭復一月下有風林橫急送小范家護
此涵星泓願從少陵博一句山木盡與洪濤傾

戲題常州草蟲枕屏

宋楊萬里

黃蜂作歌紫蝶舞蜻蜓蚱蜢如風雨先生晝眠紙帳溫
無那此輩喧夢魂眼中了了華胥國蜂催蝶喚到不得
覺來忽見四摺屏野花紅白野草青勾引飛蟲作許聲
何緣先生睡不驚

巫峽雲濤石屏志

元顧瑛

謝家綠玉屏不琢龜甲形方若陟釐紙粉縹帶苔青秀
潔庚庚絕文理十二巫峰橫隱起芙蓉照影立亭亭遠
落巴江一江水素湍洶湧翻綠濤長風吹雲白日高三
峽濤聲滿人耳箇中獨欠孤猿號胡僧謾有金壺汁灑
向素練圖不得女媧鍊石作五彩點染料應無此色此
石產景由天工略假石人磨削功石色欲盡玉色起汎
沈天碧涵清空君不聞大食貢石瑩如玉中有奇松四

時緣六月涼風卷翠濤瑟瑟秋聲戰空屋又不聞楊家
古屏刻水精中有為雲之美人海綃衣裳為煙霧姓名
自語非真真二物化去固已久價重隋珠難再有君家
玉屏獨在世勿落忍人豪奪手我聞故人楊鐵仙束帶
拜之如米顛起來發狂捉鐵筆醉墨寫入青瑤鐫何日
乘舟上魚復喚取巴童唱巴曲更借丹丘粉墨屏對按
巫山真面目

五言律

屏

唐
李嶠

洞徹琉璃蔽威紆屈膝迴錦中雲母列霞上織成開山
水含春動神仙倒景來脩身兼竭節誰識作銘才

詠屏風

唐
袁恕已

綺閣雲霞滿芳林草樹新鳥驚疑欲曙花笑不關春山
對彈琴客谿畱垂釣人請看車馬路行處有風塵

詠舊屏風

唐
姚合

時人嫌古畫倚壁不曾收雨滴膠山斷風吹絹海秋殘

雲飛屋裏片水落牀頭尚賸殘花鳥君能補綴不

屏風

明薛蕙

屏風十二曲羅列洞房隅雙環金屈膝四角錦流蘇蛾
眉行處隱玉袖坐中扶因歌畱上客翠蓋少踟躕

題魏少府破屏風

明柳應芳

依倚忘年歲凝塵冀爾容乍通宵案燭不掩午堂鐘射
雀猶存影彈蠅已失踪勿言新可代官冷若為供

五言排律

水墨障子

唐李洞

若非神助筆硯水恐藏龍研盡一寸墨掃成千仞峰
辟根堆亂石牀罅種枯松岳麓穿因鼠湘江綻為蜚挂衣
嵐氣濕夢枕浪頭春只為少顏色時人著意慵

雲母屏風隔坐

唐闕名

彩障成雲母丹墀隔上公才彰二紀盛榮播一朝同近
玉初齊白臨花乍散紅凝姿分縹緲轉珮辨玲瓏意慙
恩偏厚名新寵更崇誰知歷千古猶自仰清風

七言律

題西平王舊賜屏風

唐 溫庭筠

曾向金扉玉砌來，百花鮮濕隔塵埃。
披香殿下櫻桃熟，結綺樓前芍藥開。
朱鷺已隨新鹵簿，黃鸝猶識舊池臺。
世間剛有東流水，一送恩波更不迴。

觀山水障子

唐 伍喬

功績精妍世少倫，圖時應倍用心神。
不知草木承何異，但見江山長帶春。
雲勢似離巖底石，浪花如動岸邊蘋。

更疑獨泛漁舟者便是其中舊隱人

楊龍圖蘆鴈屏

宋趙抃

省宇屏圖詰匠成寫傳蘆鴈筆尤精斜依風葦叢叢裊
遠颺煙波渺渺平弋者定嗟何所慕鵬搏莫怪不能鳴
公看羽翼飛騰處有意青雲萬里程

魚魴屏

元曹文晦

何人遺公魚魴屏定須東海膾長鯨不應虛室自生白
正與幽人相對清素色曉涵銀漢冷寒光夜照玉蟾明

平生未識豪家客金雀徒聞後世名

五言絕句

題友人雲母障子

唐王維

君家雲母障時向野庭開自有山泉入非因彩畫來

早秋山水硯屏

宋文同

晚靄隔遠岫秋容入平林方素僅盈尺巖谷能許深

祝孝友作枕屏小景以霜餘茂樹名之因題此

詩

宋朱子

山寒夕颺急木落洞庭波幾疊雲屏好一生秋夢多

題梅屏

明劉基

樹杪過流星輕霜落半庭疎花與孤客相對一燈青

七言絕句

題詩屏風絕句

唐白居易

相憶采君詩作障自書自勘不辭勞障成定被人爭寫
從此南中紙價高

答微之

白居易

君寫我詩盈寺壁我題君句滿屏風與君相遇知何處
兩葉浮萍大海中

屏風

唐
李商隱

六曲連環接翠帷高樓半夜酒醒時掩燈遮霧密如此
雨落月明俱不知

詠繡障

唐
胡令能

日暮堂前花蕊嬌爭拈小筆上牀描繡成安向東園裏
引得黃鶯下柳條

寒林石屏

唐僧無悶

草堂無物伴身閒，惟有屏風枕簟間。
本向他山求得石，却於石上看他山。

西湖竹枝詞

元潘純

雲髻高梳鬢不分，掃除虛室事元君。
新糊白紙屏風上，盡畫蓬萊五色雲。

御定佩文齋詠物詩選卷一百六十四

欽定四庫全書薈要卷一萬八千七百八十七集部

御定佩文齋詠物詩選卷一百六十五

簾幕類

五言古

詠幔

齊王融

幸得與珠綴，幕歷君之楹。
月映不辭卷，風來輒自輕。
每聚金爐氣，時駐玉琴聲。
但願置尊酒，蘭釭當夜明。

賦得簾塵

梁徐摛

朝逐珠胎卷夜傍玉鉤垂恒教羅袖拂不分秋風吹

賦得珠簾

隋
盧思道

鑑帷明欲斂照檻色將晨可憐疎復密隱映當窻人浮
清帶遠吹含光動細塵落花時屢拂曾待玉階春

五言律

賦簾

唐
太宗

參差垂玉闕舒卷映蘭宮珠光搖素月竹影亂清風彩
散銀鈎上文斜桂戶中惟當雜羅綺相與媚房櫳

帷

唐
李嶠

久閉先生戶高褰太守車
羅將翡翠合錦逐鳳凰舒
明月彈琴夜清風入幌初
方知決勝策黃石受兵書

簾

李嶠

清風時入燕紫殿幾含秋
曖曖籠靈閣纖纖上玉鈎
牕中翡翠動戶外水精浮
巧作盤龍勢長迎飛燕遊

詠簾

唐
萬楚

玳瑁昔稱華玲瓏薄絳紗
鈎銜門勢曲節亂水紋斜
日

弄長飛鳥風搖不卷花自當分內外非是為驕奢

破幌

宋張耒

破幌一點白卧知千里明低牕通雪氣喬木尚風聲傳
警軍城靜鳴鐘梵刹清高眠尋斷夢鄰樹已烏驚

五言排律

簾

唐杜牧

徒云逢剪削豈謂見偏裝鳳節輕雕日鸞花薄飾香閤
屏何屈曲憐帳解周防下漬金階露斜分碧瓦霜沈沈

伴春夢寂寂侍華堂誰見昭陽殿眞珠十二行

七言律

詠簾

唐徐夤

素節輕盈透影勻何人巧思間成文閒垂別殿風應度
半掩行宮麝欲熏繡戶遠籠寒焰重玉樓高挂曙光分
無情幾對黃昏月纔到如鈎便墮雲

琉璃簾

元馬祖常

吳儂巧製玉玲瓏翡翠蝦鬚迴不同萬縷橫陳銀色界

一塵不入水晶宮月華遠射離離白燈影斜穿細細紅
相隔神仙纔咫尺靈犀一點若為通

五言絕句

宮中樂

唐令狐楚

九重青鎖闥百尺碧雲樓明月秋風夜珠簾上玉鈎

四時宮詞

元曹文晦

水殿笙歌啟宮門聽漏籤薰風吹藕蕩香度水精簾

七言絕句

簾

唐
陸龜蒙

枕映疎容晚向敲
秋煙脈脈雨微微
迸風障燕尋常事
不學人前當妓衣

簾

唐
羅隱

疊影重紋映畫堂
玉鈎銀燭共熒煌
會應得見神仙在
休下真珠十二行

其二

翡翠佳名世共稀
玉堂高下巧相宜
殷勤為囑纖纖手

卷上銀鈎莫放垂

宮詞

宋
花蕊夫人

紗幔薄垂金麥穗
簾鈎纖挂玉蔥條
樓西別起長春殿
香壁紅泥透蜀椒

其二

翠華香重御爐添
雙鳳樓頭曉日暹
扇掩紅鸞金殿悄
一聲清蹕捲珠簾

東樓雨中

金
王元粹

多年蒼柏拂檐枝燕子飛來語向誰枕簟不妨畱客住
滿樓風雨下簾時

殿試和史參政韻

元馬祖常

五雲天近晝香殘紅白花枝滿藥闌一夜東風吹小雨
殿頭持卷隔簾看

上京雜詠

元薩都拉

沙苑棕毛百尺樓天風搖曳錦絨鈎內家宴罷無人到
面面珠簾夜不收

西湖絕句

薩都拉

待得郎君半醉時
笑將紈扇索題詩
小紅簾捲春波綠
渡水楊花落硯池

明仁殿進講

元貢師泰

黃金為帶玉為檐
劒戟如林衛紫髯
也愛儒臣勤講讀
向前輕揭虎皮簾

宮詞

元納新

瓊島苔荒內苑西
斑斕綺石甃清漪
御牀不許紅塵到

黃幔長教窄地垂

艷陽詞

明宋濂

幾番花信逐時添
諸柘新篳酒正甜
莫道曉風猶料峭
內家新賜却寒簾

寄沈介軒

明沈翊

錦繡湖山罨畫樓
君家住在小瀛洲
洞簫吹上花間月
十二珠簾不下鉤

御定佩文齋詠物詩選卷一百六十五

欽定四庫全書薈要卷一萬八千七百八十八集部

御定佩文齋詠物詩選卷一百六十六

如意塵拂類

五言古

塵尾

梁宣帝

匣上生光影毫際起風流本持談妙理寧是用催牛

鐵如意

宋謝翺

仙客五六人月下鬪婆娑散影若雲霧遺音杳江河其

一起楚舞一起作楚歌雙執鐵如意擊碎珊瑚柯一人
奪執之晚者一人過更舞又一人相向屢傴僂一人獨
撫掌身掛青薜蘿夜長天籟寂宛轉思如何

玉麈尾

謝翱

客持麈尾柄色奪環與玦塵心隨影祛一片若行雪神
獸潛空山何年探靈穴忽失落人手遂為談者悅陰崖
起白氣篆古踰軒頡一拂沈蘚文再拂字不滅三拂蛟
螭騰世眼不能別投爾陰崖巔驚怪吐其舌

七言古 附長短句

和趙給事白蠅拂歌

唐 盧綸

華堂多衆珍白拂稱殊異柄裁沈節香襲人上結為文
下垂穗霜縷霏微瑩且柔虎鬚乍細龍髯稠皎然素色
不因染淅爾涼風非為秋羣蠅青蒼恣遊息廣庖萬品
無顏色金屏成點玉成瑕晝眠宛轉空咨嗟此時滿筵
看一舉荻花忽旋楊花舞晝如寒隼驚暮禽颯若繁埃
得輕雨主人說是故人畱每戒如新比白頭若將揮玩

閒臨水願接波中一白鷗

梭櫚蠅拂歌

唐韋應物

梭櫚為拂登君席青蠅撩亂飛四壁文如輕羅散如髮
馬尾毳牛不能絜柄出湘江之竹碧玉寒上有纖羅縈
縷尋未絕左揮右灑煩暑清孤松一枝風有聲麗人紈
素可憐色安能點白還為黑

七言律

謝張直卿以鐵如意見遺

明朱多炆

土花斑駁錦模糊一片寒冰出鍛爐
致向書中稱折角捉來石上穩跣
趺提攜起舞旋長袖慷慨酣歌缺
唾壺多謝司空饒博物祇愁無地
擊珊瑚

竹如意

明
朱之蕃

斲取鏗金戛玉枝不資型範自離奇
堅持勁節羞茅靡揮霍虛心與物宜
花雨爭飛從握手閒雲靜看獨支頤
客來指點潛身處免作長竿渭上垂

松塵

朱之蕃

捉柄從誇手玉如青松振鬣自蕭疎折來偏助談鋒勁
揮處猶看翠靄舒謝却猩紅休染浣畱將鱗甲莫捐除
清風謖謖渾忘倦朗月澄懷坐碧虛

七言絕句

竹拂子

金秦略

覓箇龜毛也是難直教擊碎釣魚竿世人不用輕分別
信手拈來總一般

御定佩文齋詠物詩選卷一百六十六

欽定四庫全書薈要卷一萬八千七百八十九

集部

御定佩文齋詠物詩選卷一百六十七

砧杵類

五言古

夜聽擣衣

晉曹 昆

寒興御紈素佳人治衣襟冬夜清且永皓月照堂陰纖
手疊輕素朗杵叩鳴砧清風流繁節迴飈灑微吟嗟此
嘉運速悼彼幽滯心二物感余懷豈但聲與音

擣衣

宋謝惠連

衡紀無淹度晷運倏如催白露滋園菊秋風落庭槐肅肅莎雞羽烈烈寒蟬啼夕陰結空幕宵月皓中閨美人戒裳服端飾相招攜簪玉出北房鳴金步南階櫚高砧響發楹長杵聲哀微芳起兩袖輕汗染雙題紈素既已成君子行未歸裁用筭中刀縫為萬里衣盈篋自余手幽絨候君開腰帶準疇昔不知今是非

詠擣衣

梁王僧孺

足傷金管遽多愴
緹光促露團池上
紫風飄庭裏綠下
機驚西眺鳴砧遽
東旭芳汗似蘭湯
雕金辟龍燭散度
廣陵音摻寫漁陽
曲別鵠鳴不已離
鸞斷還續尺素在
魚腸寸心憑鴈足

搗衣

梁柳惲

步櫚杳不極離堂
肅已扃軒高夕杵
散氣爽夜砧鳴瑤
華隨步響幽蘭逐
袂生跼踖理金翠
容與納宵清

華觀省中夜聽城外搗衣

梁費昶

閭闔下重關，丹墀吐明月。秋氣城中冷，秋砧城外發。浮
聲繞雀臺，飄響度龍闕。宛轉何藏摧，當從上路來。藏摧
意未已，定自乘軒里。乘軒盡世家，佳麗似朝霞。圓瑤耳
上照，方繡領間斜。衣熏百和屑，鬢插九枝花。昨暮庭槐
落，今朝羅綺薄。拂席卷鴛鴦，開幔舒龜鶴。金波正容與，
玉步依砧杵。紅袖往還縈，素腕參差舉。徒聞不得見，獨
夜空愁佇。獨夜何窮極，懷之在心側。階垂玉衡露，庭舞
相風翼。瀝滴流星輝，燦爛長河色。三冬誠足用，五日無

糧食揚雲已寂寥今君復弦直

題畫屏風

北周庾信

擣衣明月下靜夜秋風飄錦石平砧面蓮房接杵腰急
節迎秋韻新聲入手調寒衣須及早將寄霍嫫姚

始聞早砧

明張羽

寂寂秋景晏蕭蕭涼吹生閨人感寒至一軫遠人情嘹
亮清砧動紆徐搗杵鳴微茫帶煙遠蕭疎出簾輕此時
離居客單眠夢亦驚披衣一惆悵斜月滿山城

七言古

擣練篇

唐韋莊

月華吐豔明燭燭青樓婦唱擣衣曲
白袷絲光織魚目菱花綬帶鴛鴦簇
臨風縹緲疊秋雪月下丁東擣寒玉
樓蘭欲寄在何鄉憑人與繫征鴻足

和逯先生聞砧韻

明沐昂

秋高萬木脫林塢與子庭前開綠醕
忽聞別院動砧聲西風吹斷蕭蕭雨
隔岸人家紅樹稀辭巢燕子故飛飛

酒酣自起為君舞正愛涼飈吹我衣

五言律

擣衣

元張端

為擣清砧素令人念藁砧近寒將鴈至入夜正蛩吟霜
月三更杵闌山萬里心金風何太弱不與送餘音

御苑秋砧

明田汝棣

露結金扉冷霜淒繡幕深褰羅出素手乘月響清砧高
入宮雲斷低隨閣漏沈無言為誰苦永夜助蛩音

七言律

搗衣石

明瞿佑

一方滑淨絕苔錢才屬秋閨響便傳長夜未央風陣急
美人相對月華圓高於鳳闕黃金礎厚勝花堦綠玉甌
幾度晚涼眠不得丁東聲到客愁邊

夜坐聞砧

明吳寬

何處疎砧隔短牆東鄰有婦搗衣裳風林落葉秋聲動
露草鳴蛩夜氣涼久別官寮忘館閣每從兒子話家鄉

強扶筇竹歸深院半壁殘燈獨上牀

館試秋夜聞砧

明王格

蕭瑟秋風散晚涼誰家清夜擣衣裳
丁丁遙應疎鐘響
簌簌還如落葉忙
明月有情留小院
征鴻無數挾輕霜
不堪客夢湘雲遠
獨對寒燈思渺茫

五言絕句

江樓聞砧

唐白居易

江南授衣晚十月始聞砧
一夕高樓月萬里故園心

七言絕句

秋夜聞砧

唐杜荀鶴

荒涼客舍眠秋色砧杵家家弄月明不及巴山聽猿夜
三聲中有不愁聲

聞砧

金酈權

玉關消息到長安處處砧聲擣夜闌想得月殘音響斷
一燈清照剪刀寒

御定佩文齋詠物詩選卷一百六十七

欽定四庫全書薈要卷一萬八千七百九十

集部

御定佩文齋詠物詩選卷一百六十八

書籍類

四言古

孝經詩

晉傅咸

立身行道始於事親上下無怨不惡於人孝無終始不離其身三者備矣以臨其民

書帙銘

宋謝靈運

懷幽卷蹟戢妙抱密用舍以造舒卷不失亮惟勤翫無
或暇逸

五言古

詠書帙

梁蕭統

擢影兔園池抽莖淇水側朝暎出嶺雲暮聚飛歸翼幸
雜緗囊用聊因班女織一合軒義曲千齡如可即

和劉明府觀湘東王書詩

梁庾肩吾

陳王擅書府河間富典墳五車方累篋七閣自連雲松

槩芳帙氣柏熏起厨文羽陵青簡出媯泉綠字分方因
接遊聖暫得奉朝聞峰樓霞早發林殿日先曛洛城復
接限歸軒畏後羣

七言古

無書歎

元胡天游

六經既降諸子出後代枝葉何其多眼中萬卷忽如掃
無乃天意增繁苛陳言故紙本糟粕吾道耿耿終難磨
劫灰不赭孝先笥晝卧坦腹時摩挲

五言律

蠹簡

元揚載

往古韋編在何年始汗青蠹蟲深卜宅蚪蚪少成形泯
滅沾秦火搜羅出漢庭斯文天未墜不敢望全經

七言律

玉堂讀卷

元虞集

玉堂策士詔儒臣御筆親題墨色新省樹坐移簾底日
宮壺馳賜殿頭春虞庭制作變龍威漢代文章董賈醇

書閣暮年偏感遇但歌天保播皇仁

七言絕句

題朱兵曹山居

唐張祐

朱氏西齋萬卷書水門山閣自高疏
我來穿穴非無意願向君家作壁魚

襄陽為廬竇紀事

唐元稹

帝下真符召玉真偶逢遊子暫相親
素書三卷留為贈從向人間說向人

聞日本圓載上人挾儒家書洎釋典以行更作

一絕以送

唐
陸龜蒙

九流三藏一時傾萬軸光凌渤海聲從此遺編東去後
却應荒外有諸生

寫莊子

唐
李九齡

聖澤安排當散地賢侯優貸借新居閒中亦有閒生計
寫得南華一部書

寄居江邨欲借書諸公先寄此詩

宋 王庭珪

卜築江邨翠嶺坳
喜君書室近衡茅
牙籤插架幾千冊
準擬從頭借一鈔

時習齋

金 宇文虛中

未厭平生習氣濃
更將餘事訓兒童
魯論二萬三千字
悟入從初一句中

醉經齋為虞卿麻長官賦

金 周 昂

詩書讀破自融神
不羨雲安麴米春
黃卷至今真味在

莫將糟粕待前人

天歷庚午會試院中馬伯庸尚書楊廷鎮司業
及玄皆乙卯榜進士偶成絕句紀其事出院
明日有敕督修經世大典又成小詩寄諸弟

錄一

元 歐陽玄

聖主宮中遊幸疎日臨秘閣翫芸儲昨朝蘭省纔開試
清曉玉音催著書


贈長垣宗室

明 邊貢

瑤室青編萬卷餘
宮中誰道日閒居
家臣昨夜長安去
猶向君王乞秘書



御定佩文齋詠物詩選卷一百六十八



總校官庶吉士臣侍朝

校對官檢討臣蕭九成

校對官偏修臣許兆椿

謄錄舉人臣張昱

謄錄監生臣馬植基